

**Imaani avatangiisit illersorneqarnissaat pillugu
Inatsisartut inatsisaata allanngortinneqarnera pillugu
Inatsisartut inatsisaat
(Nalunaarutiginnittarnermut maleruagassap
kalaallisut danskisullu assigiinngissuteqarneranut
naqqiut, umiarsuarnik misissuisarneq
misissuilluarternerlu pillugit maleruagassap
erseqqissarneqarnera kiisalu pineqaatissiisarnermut
maleruagassat allanngortinneqarnerat)**

§ 1

Imaani avatangiisit illersorneqarnissaat pillugu Inatsisartut inatsisaat nr. 15, 8. juni 2017-imeersumi makkua allanngortinneqarput:

1. § 41 imatut oqaasertalerneqarpoq:

“ **§ 41.** Assartuutini piginnittut, atuisut taakkulu aquttui pisuni § 58-imi pineqartuni imaanut eqqaasimagunik imaaniluunniit ikuallaasimagunik, tamanna Naalakkersuisunut ingerlaannartumik nalunaarutigissavaat.”

2. § 44-imi imm. 2-tut ilanngunneqarpoq:

“ *Imm. 2.* Imm. 1 malillugu misissuinerni oqartussat imm. 1-imi taaneqartut uppersaattissanik assiliisinaapput, assileeqqiisinaapput tiguisinnaallutilluunniit, kiisalu pigisanik allanik akeqanngitsumik tiguisinaapput. Pigisanut tiguneqartunut uppersaat tunniunneqassaaq.”

3. § 49-imi imm. 4-tut ilanngunneqarpoq:

“ *Imm. 4.* Imm. 3 malillugu misissuinerni oqartussat imm. 1-imi aamma 2-mi taaneqartut uppersaattissanik assiliisinaapput, assileeqqiisinaapput tiguisinnaallutilluunniit, kiisalu pigisanik allanik akeqanngitsumik tiguisinaapput. Pigisanut tiguneqartunut uppersaat tunniunneqassaaq.”

4. § 62, imm. 3, imatut oqaasertalerneqassaaq:

“ *Imm. 3.* Piaaraluni imaluunniit annertuumik mianersuaalliorluni unioqqutitsisoqarnerani akiligassiisutaasoq annertusineqarsinnaavoq imaluunniit Kalaallit Nunaanni pinerluttulerinermut inatsit malillugu allanik

pineqaatissiisoqarsinnaalluni, unioqutitsinermi:

- 1) avatangiisinik ajoqusiisoqarpat imaluunniit taamatut pisoqarnissaanut ulorianartorsiortitsisoqarpat, imaluunniit
- 2) pineqartup nammineerluni allalluunniit aningaasaqarnerannut, tassungalu ilanngullugu sipaaruteqarnissamut, iluaqusiinissaq anguneqarsimappat siunnerfigineqarpalluunniit.”

5. § 63 imatut oqaasertalerneqassaaq:

“ § 63. Peqqussutini, § 10, imm. 3 aamma 4, § 11, imm. 2, § 12, § 15, imm. 2 aamma 3, § 16, imm. 2, § 18, imm. 3, § 19, imm. 4, § 20, imm. 4, § 21, § 26, § 30, imm. 7, § 31, imm. 5, § 32, imm. 4, § 33, imm. 1 aamma 2, § 34, § 35, imm. 1 aamma 2, § 36, imm. 3, § 42, imm. 1 aamma 2, § 43, imm. 1-3, aamma § 45, imm. 4 naapertorlugit suliarineqartuni Kalaallit Nunaanni pinerluttulerinermut inatsimmi maleruagassat naapertorlugit akiliisussanngortitsinikkut pineqaatissiissutissanik aalajangersaasoqarsinnaavoq. Kiisalu pissutsinik § 62, imm. 2-mi aamma 3-mi taaneqartunut assingusunik pisoqartillugu akiliutissap annertussusilerneqarneranik sukannernerulersitsinissaq annertusisitsinissarlunniit aalajangersarneqarsinnaavoq, imaluunniit Kalaallit Nunaannut pinerluttulerinermut inatsit malillugu allanik pineqaatissiisoqarsinnaalluni.”

§ 2

Inatsisartut inatsisaat ulloq 1. januar 2019 atuutilerpoq.

Namminersorlutik Oqartussat, ulloq 27. november 2018

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

